

# Sortaldeko izarra

Igotz

Sortaldeko izar zuri!,  
argi egidazu.  
Belen aldera, otoi,  
—beñola iru aztiak—  
zuzendu nagizu.

Ba-dot griña leial bat,  
danik biziena:  
Josu'ren aurrean nik,  
seaskari kulunka,  
ustu nai barrena.

Baiña gau illunez nabil,  
biotza nasirik.  
Txoriak kantarik ez  
eguzki argiz baiño,  
ez baitau kemenik.

Itun dago lorea  
gau-oxin baltzean.  
Aren gura bizia  
nok lekike, illuna  
astindu naiean!

Izar! Oi, izar zuri!  
Sortaldeko izarra!  
Bizitza zear bekit  
bide-erakusle zardain  
zure argi-garra!